



Comentario

Pueblo di Noord y un realidad

Pa años por a nota un situacion poco extraño. Di un banda por a observa con e poblacion di Noord a crece enormemente y con e parti di e pais, a bira tambe un lugar hopi frecuente pa turistanan, pa su cercania na e hotelnan. Pero na mes momento por nota tambe, cu poco atencion a worde dirigi pa años na e Pueblo di Noord y ora tuma nota di desayonan cu ta tuma lugar, mester admiti cu pa años Noord ta un pueblo practicamente lubida.

Cu awor ta pidi pa tin servicio di ambulance mas den vecindario di Noord, ta algo cu por a spera añan pasa. Si un hende bira malo o un accidente keda registra na Noord, mester saca un ambulance for di Playa, lague cubri e distancia te Noord pa hibe hospital cu ta keda algun minuut for di e sitio di suceso. Un situacion ridiculo, cu ta papia pa su mes y en verdad mester worde coregi mas pronto cu ta posible ya cu e ta un fayto cu a manifesta su mes pa años.

Notable ta tambe e falta di cierto servicionan na Noord y e falta di vista ariba e realidad di Noord, cu asina conoce un di e cruzadanan mas peligroso na Aruba, esta esun den vecindario directo di Rio Grande. Un cruzada, cu ta worde frecuente continuamente pa turistanan tambe y hopi biaha trafico ta conoce situacionnan peligroso na e sitio. Pero nada a worde haci pa coregi e situacion fastioso. Na momento di yobida e sitio ta worde transforma den un trampa, pero nada ta pasa.

Mientras Noord ta e distrito di Aruba cu ta keda mas cerca di hotelnan, por nota cu te awe Noord no conoce un Esso Station, cu ta necesario pa publico local, pero tambe pa tur e turistanan cu ta huur auto y por haya nan cu poco gasolin den tanki sin un Esso Station na vista.

Hopi cos por worde haci na Noord si realmente tin interes pa haci algo. Pasobra Noord ta keda cerca di e centro turistico di Aruba y manera ya a worde bisa, hopi turista ta pasa den Noord durante nan estadia na Aruba. Pesey e distrito aki ta sirbi perfectamente pa un cantidad di posible proyectonan cu ta directamente relaciona cu turismo. Proyectonan, cu no necesariamente mester ta caminda pa come o bebe y cu no mester cambia e situacion actual di Noord tampoco. Pero tin oportunidad pa un cantidad di negoshi nobo na Noord, semper y cuando sa di duna contenido na esaki.

Na momento cu a construi cas di pueblo na Noord a introduci un aumento drastico den e cantidad di habitantenan di Noord. Mas trafico ariba caminda; mas necesidad pa cubri, manera ta e caso den cualquier otro bario.

Mester tene cuenta cu e necesidadnan aki na momento di planificacion. Ainda por corda, con tempo cu a bay traha ariba cierto construccion na Noord, a lanta voznan di preocupacion pa e forma cu sin mas a cambia e red di rooinan na Noord. Esnan cu conoce e situacion, nunca a haya oportunidad pa papia. Nan reclamo a bay perdi den biento.

Mester cuminsa tene cuenta cu e realidad y e necesidadnan di Pueblo di Noord, cu poco biaha ta sali den atencion. Pero Noord ta forma parti di Aruba y como tal ta worde confronta cu mes problema cu henter Aruba. Ta di spera cu lo por tuma pasonan necesario pa asina realmente bay presta atencion na loke mester pa asina demostra cu Noord tambe ta parti di Aruba.

Avionetanan pirata lo desaparece di tereno di aeropuerto

ORANJESTAD(AAN)—Mientras te ainda nada a worde haci pa kita e avionetanan pirata for di tereno di aeropuerto, ariba corto plazo por spera accion di parti di autoridad. Aeropuerto ta bay drecha su tereno y si doñonan no bin busca nan avioneta, nan lo desaparece for di tereno di aeropuerto.

Segun informacion cu DIARIO a ricibi ta e intencion di Gobierno pa ariba termino corto publi-

ca avisanan den medionan di comunicacion na Merca pa asina pidi atencion di e doñonan di avionetanan pa bin reclama nan na Aruba.

Entre e avionetanan tin cu por worde drecha pa poco placa.

Si e doñonan no reaccionan no mester exclui e posibilidad cu ariba corto plazo lo cuminsa busca otro caminda pa deponer e avionnan. Informantenan a bisa cu lo por busca otro

sitio pafor di aeropuerto pa pone nan, pero cu no mester descarta e posibilidad cu hasta por dicidi di zink e avionetanan.

Tambe lo ta posible pa e alrededor di 14 avioneta worde bendi na publico local interesa.

Aeropuerto mester tuma medida ya cu a tene destaho publico pa pronto por cuminsa cu labornan pa por sigui mehora e equiponan y e tereno di aeropuerto.

Juez Comisario ta investigando caso contra Rito Croes

ORANJESTAD(AAN)—Ayer DIARIO a tuma contacto cu Fiscal Mr. Lugo pa haya mas informacion encunto e caso contra Rito Croes.

Mr. Lugo a manifesta cu actualmente e caso ta den instruccion esta cu Juez Comisario ta haciendo e investigacion.

Mr. Lugo a sigui bisa cu nan ta spera di cera e instruccion un di e dianan aki. Si no ta e siman aki ta otro siman y despues lo bay studia tur loke nan tin ampliamente y despues lo manda e caso Corte.

Mr. Lugo a duna di conoce cu si resulta cu

ainda tin cierto punto cu mester worde investiga Ministerio Publico por pidi pa pospone e caso.

DIARIO a puntra Mr. Lugo si tin duda cu Rito Croes ta culpable.

Mr. Lugo a manifesta cu a concentra full un investigacion ariba e persona

aki. Esaki ta significa pues cu pa Ministerio Publico Rito Croes ta e persona principal den e caso aki y ta haya e nomber di acusado.


Awor durante tratamiento di e caso Juez lo determina si Rito Croes ta culpable si of no.

Directiva di Bankeronan Arubano pa año 1988

ORANJESTAD(AAN)—E Asociacion di Bankeronan Arubano ta anuncia cu durante su reunion di dia 19 di Januari 1988 e siguiente personanan a keda eligi pa e año aki:

Dick A. van den Ham - Presidente; William G.

Carson, Vice President; Ronald H. Poulsen, Tesorero, Olga Lee Hernandez, Secretaria.



Rev. Winston Warrel, di e iglesia Methodista na San Nicolas a haci un bishita di cortesia cerca Su Excelencia Gobernador F.B. Tromp relaciona cu e celebracion di e 50 año di existendia di "Methodism" na Aruba. Durante e encuentro ariba menciona a entrega un buki informativo na Gobernador F.B. Tromp den presencia di señora Cynthia Brown y señora Olivia Bryson, representando e congregacion Methodista.